

雲臥山莊詩集

雲臥山莊詩集卷第一

湘陰 郭崑燾 樗叟

杜公亭晚眺

幽意淡無極行行登大隄杜公不可接芳草自萋萋山
與白雲盡天隨落日低哀時詞客淚吟望野淒迷

新康道中

湘月逐行舟遙天生暮秋鄉心渺無際客夢墮孤洲短
髮慚年少高歌紀壯游雄心消未得把酒看吳鉤

車中偶成

征途苦積雨平地成深溝疲馬踏汙泥挽車如挽舟雙
輪激行潦喧若水紛流乍聞波濤聲驚起開兩眸水昏
不見地高低任所投左右忽交簸觸腦生癭瘤坐臥百
不適慨歎無時休顧念丈夫志所貴豈身謀艱難鍊筋
骨民物託綢繆早知聖賢心不取巢與由悠悠四方行
險阻非吾憂

贈江岷樵

忠源

卽以誌別

老筠同譜誼吾子久知名燕市一爲別襟懷相對清和
平藹春氣患難見交情舉世方徵逐相期保此生

鄒大今奇士植躬何介然支離苦多病調護賴君賢至
性久逾篤斯人貧可憐相依共叩哂嗟爾意纏綿
長安冠蓋地車馬滿塵埃長日掩關臥逢君載酒來艱
難還此別懷抱向誰開悽惻旗亭路陽關一曲哀

曉過沙河

車馬勞勞行未已又隨曉色過沙汀風聲遠帶千林雨
雲影中含數點星絡繹火光連地白模糊山色矗天青
客程迢遞懷前古憑弔遺墟取次經

邯鄲

佳人名士頹唐盡燕趙風流今渺然一片荒城餘落照
幾家茅屋起炊煙廬生久熟黃梁夢過客猶思白日眠
富貴神仙兩無意歸休吾欲事芸田

虎牢

千古兵爭地崎嶇見此關雄風渺何在天險尙人間絕
壑響流水朝陽隱亂山停車惆悵意寥落野花環

昆陽

煙樹迷離曉色涼西風一劍過昆陽當年雷雨同聲勢
終古河山鬱莽蒼大敵指麾裁見勇將軍謹厚故難量

祠堂此日莓苔長寂寞雲封舊戰場

南陽望臥龍岡有感

南陽城郭曉煙重一帶茅廬接舊封當日飛潛關國計
祇今輦鼓正邊烽屢聞燕市求名馬會見深山起臥龍
我自麤才甘放斥秋原吟望想遺蹤

同諸君文昌閣看荷花用伯兄韻

我馬困風塵歸還就休息炎威夏方燒言訪水晶域濃
雲被天地觸處成絕劣飛梁迸石火蒸歎近尤逼煎腸
無雷雨熱汗每沾臆羣行忘後先胸膈刪柴棘餘霞忽

瀕洞散作眾赫赭傑閣俯城東經營費繩墨歡呼醉眾
坐頽顏或衫色開軒招涼風頗復勝酒力池蓮送幽香
翠蓋自反側或如象鼻彎或似箭鋒直傳觀碧筒杯此
樂亦云極嗟余試京兆未放雲霄翼島瀛去軒騰誰復
分黑白戢戢公卿門車馬日填塞趨時無捷脛迷古得
心織世途浩塹坎焉用憂偪仄驅馬出西城走簡約相
識行人見輻輳其儀靡差忒夾道長禾麥環途多黍稷
謂是太平游詩歌聞樂職吾鄉俗猶醕服疇亦食德游
賞事常歉畊讀意固得吾徒稍好事轉念心惻惻維昔

初結構荒祠煩墾植居民說遺蹤高義應不熄

閻爲先伯鈞台

公創建

賤子未蹉跎諸君各軒特飛騰宜有人此事當心

泐對酒起雄心壯懷聽自默丈夫會有志來者誰能測
差哉動高駕結念抒軫轡偶茲得間曠山水事游陟竝
立一遐睎塵埃淨揩拭月影墮波流山光照棗櫓長嘯
復歸來薰風吹向北

江岷樵兄見過喜賦

賤子守鄉里短拙域咫聞計貢走燕臺城西始逢君長
揖通悃欵扉落含溫文汪汪激清波靄靄披晴雲挾纈

不知暖投醪竟忘醺自茲結深契如水誰能分聖賢道
消歇世路胥勞勞射影動萋斐藏山竄夔犢居之不聽
瑩那更療厥癰吾子激高義俊鶻避鴉羣揜揜凝盲中
忽茲覩朝昕愛極肯自外投詩當吹簫久聚未覺歡離
別中心慊獻璞同見則曰歸事鋤耔惘惘出 皇都炎
雲夏氤氲送我復城西含涕各無云一別四千里迢遙
阻江濱長沙得尺素心交道懃懃恨無乘風翼與子同
翻翁殘秋星斗大僵臥息勞筋開戶忽見子握手雜悲
欣駭聞鄧鐵松

鶴齡

一死隔鄉枌柳溪亦摧折

鄒興
愚慘

淡鬱秋氛旋櫬仗君扶長途備劬勤嗟哉師友誼時俗
徒紛紜徵逐飮酒食情好亦孔殷變幻倏百端如犬爭
狺狺生死苦相保君德誠可熏新詩俄出袖天葩燦續
紛開讀息凡響大塊噓砢礲香廚羅八珍博取或羶葷
雕琢出至寶灌溉成奇芬仙人空中下彩雲擁輓輶鳳
翼舒皎皎龍身跳蜃蜃俯視眾所寰聚鬩喧蠅蚊噫嘻
斯道中津涯浩無垠我性頗耽此肺腑斲雲斤楚人淚
懷石野老謬獻芹羸師敢言勇強勉張吾軍同年鄒春
笙

溥霖

偕君著詩勳會侯

國藩

殫精進汲汲膏油焚徐

芝馮卓懷

勵古處顏貌交閭閻以我廁其間餘香得沐
薰晨星一朝散何時當再窘詩成轉長歎中腸不能斫
子行復過發遠水流潺湲明日長沙去鼓棹迎江曛

雜詩

家世承儒修少小矜骨董撥雲眺瑤光去薪取丹汞盛
蹈追韓蘇鑽仰跂周孔寸心起五嶽獨造苦鑿空謂是
鸞鶴姿高天行可濺舉翮搏扶搖墮地仍埃壘習射入
澤宮去來徒倥偬繭足向槃阿人事復填總皇皇爽塏
居聚飛多蚊蠓欲驅手無拂愁懷鬱成懜何以解吾憂

予鬢方華華

西山鬱磅礴神京耀臺榭戢戢冠蓋場混并互凌跨良
會恣歡樂喧闐羅酒肴車騎集金貂絲竹圍錦靶九陌
馳塵埃吮聒極日夜小儒守陳編兀兀死不暇亦思褰
裳從趙趙吁自怕遶城駿馬多淺見未肯借

鮑肆不聞香蘭室不聞臭豈惟氣類殊亦各安所狃昔
我登培塿謂是殆罕覲忽茲覩高山卓立拔羣岫多慙
足力弱欲造恐顛仆登陟纔及半豁然開眩瞽始知乾
坤大自笑耳目陋回頭望眾峯羅列徒相湊所見隨所

處薰蕕無雜糅置身良貴高不然終俯就

東家富財帛填門溢車蓋西家貧無炊落莫無人會嗟
予命窮薄實惟兄弟賴南山連理木枝葉相鉤帶上有
鷦鷯鳥比翼交颺颺鳥孤飛則難木孤根豈大車蓋有
時絕兄弟無時外百足死不僵邗復憂顛沛相好無相
尤我分茹粗糲

流雲倏東馳白日黯無色開門驚四顧天高野煙塞礎
潤知雨零履霜肇冰泐天時與人事日日相促逼逝水
無駐波潮汐安可息甌石吾何求隱憂常惻惻

東海有釣叟受術任公子小池蓄魚鰕把釣恣所指水
淺巧易施庖廚足鯖鯉欣欣自矜然謂是固絕技一朝
泛海中洪濤亂雙耳長鯨奮修鱗震盪翻高水投餌去
復來愕眙驚欲死駭極棄竿遯倉皇顛厥趾羣魚嗟何
能苟得遇可詭小效期大用諒哉難足恃

鳳皇寂無聲烏鵲乃喧擾鸚鵡詎能言人前事糾譎金
丸忽駭彈僧響閤羣鳥鷹鷂擊同類聳耳何悍慄營營
樊中蠅聲取極秋杪泥塗張蚓竅徒令聞者愀安得羅
浮雞一鳴天下曉

夜合不及晨朝菌不能夕物性有自然稟受豈天庀薄
暮登襄岸頰視眾草碧風薄不足偃夾路紛充積競此
春日青那識秋霜白滿目起蒼煙擾擾鳴螻蝻感歎成
歸來空山撫松柏

昔人學屠龍三年許百中鬱鬱荒山居有力無由貢咄
嗟好身手不遇成虛哄翻令屠狗傖顛倒恣嘲弄大壑
有潛蛟噓吸生霧霽搖身向青雲川澤俄決壅誰能斷
其軀此事甯凡眾大才不小試長駕期遠控但論技果
成豈謂巧無用

寄伯兄新化

大江東去水潺潺鎮日思君愴別顏苦向天涯就升斗
祇今風雪滿關山疾鷹衝漢秋逾健老驥循途倦未還
莫倚高樓盼鄉信羅州時事不勝艱

竟使樊籠困鳳鸞中宵拔劍起長歎百年知有壘簾樂
一別誰憐道路難苦雨刁騷愁夜永歲華搖落又冬殘
桐山舊夢何堪憶多恐飢驅正未闌

題劉霞仙

蓉

雙松圖便面卽以贈別

時將之新化訪家伯兄也

雙松如兄弟枝葉互超脫又如同心友纏綿相就卽幢

幢連理枝鉤帶成繁殖應知孤立難矢共歲寒色惟獸
有卬峿惟鳥有比翼柰何我與君去路分南北我藏戴
侯畫交柯見款式去歲戴閭部熙曾爲予作雙松便面君持此扇歸對之
亮心惻吁嗟晚節謀落落何人識高平倦游客晤言好
將息寒窗展畫圖斯語或同泐

送馮樹堂

卓懷

入都兼簡曾學士

國藩

長沙二月風雪寒江天夜黑雲漫漫小西門外送君去
欲行且復相盤桓昔年燕市託深契曰金可斷臭如蘭
自時離合靡有定一別屢月常淒酸追思生平友朋好

以益爲取期必端我性脫略不偶世逢人往往遭譏姍
感君性情能篤實一真相與無雕剜抗心古道共敦勉
肯與世俗同交歡三張二陸徂不作聖賢晦昧疇窺鑽
獨上青天埽積霧手開石壁超重巒中腸鬱鬱更奇絕
面斥臺諫窮賢奸陳東上書豈好事凜凜直節畱人寢
一時笑罵乃蠶起撫時感事增憂歎良醫治疾在治本
要培元氣清心肝願持斯意語曾侯時艱責重焉可寬
煎熬文字百無補此事且讓蘇與韓

漫興

世路正多荆棘刺此生甘作嘒嘒翁市瓜不合逢貧士
買菜何緣混乃公餓虎張牙難縱飽飢鷹側目正盤空
勞勞鎮日無休息嗟爾階前子子蟲

釣罷長鯨釣巨鼃歸來射虎斬蓬蒿仰天大笑飛雲亂
閉戶狂歌白日高無數豺狼出深谷又聞蛟蜃舞洪濤
拂衣欲往嗟誰識獨剔殘燈看寶刀

重修婁烈愍公墓戴秀才

開浚

邀同人祭奠有詩

見示次韻三首

颯颯寒風拂槩桑千秋坪上雜花香

公墓在營田千秋坪當時父

老談遺烈異代衣冠弔夕陽病鳥嘯煙山慘澹飛燐穿
樹野青蒼興亡舊蹟休回首華表秋高古墓涼

欲支敗局作長城砥柱橫流獨建營諸將有家原重死
孤臣無地可偷生鼓輦慷慨朝催戰刁斗淒涼夜不鳴
殺賊未能空罵賊祇今風雨尙悲聲

爲酹忠魂手共招靈旗風捲雨瀟瀟一時歌哭齊同志
千載興觀見此朝何止丹心照桑梓忍令黃土委畊樵
嗟予此會關山隔獨倚江天望沈寥

題僧鶴慵款冬室詩集

信臣詩集卷一
禪性幾時定孤吟不肯閒十年翦頭髮一卷嘔心肝江
樹明晴旭湖陂漲晚瀾爲詩告無本古意浩漫漫

安化道中

連山如攢眉作勢屹相向又如出壑蛟螭蟠森萬狀中
間忽陡落滙作川流漲洶洶日夜號渟蓄爭一放砰訇
礙頑石橫流截犇浪駕牒抵其罅左右隘而妨十夫挽
一舟盡力與水抗布帆漸婀娜大波終崛強前進不踰
咫尺下流倏千嶂強勉及灘頭高歌神始王忠信吾何能
僥倖獲無恙噓吁險阻境獨往成惆悵艱難一身輕乘

危向漭瀆沾灑望湘雲曉帆羣峯嶂

高平雜感

客路輕千里高堂有二毛低徊看手綫潦倒掛征袍門
戶支非易沙隄築未牢經營煩老父得不愧兒曹

坡穎歡如昨郊祁事浪傳對牀能幾日分袂動經年山
勢連西粵江聲走巨川停雲浩相望風雨爲淒然
平生敦友誼寸抱獨拳拳每憶雲霞契長懷歲月延周
行多俊及大道莽風煙璫屑予何惜惟應望爾賢

倭警頻年報紛紛沸海疆君恩開馬市國計屬龍驤聞

道還蘇武終能用李綱小臣天萬里感涕獨沾裳
萬山環一縣城郭落山窩地僻舟車少民強獄訟多晚
衙喧醉客夜市走村婆異俗吾何怪蒼然詠伐柯

縣齋不寐聞笛用漁洋山人夜泊江口聞笛寄兄

韻奉簡伯兄兼示季弟

時俱客江西

一笛落孤枕驚心百感生關山羈客思骨肉故園情皎
皎月當戶瀏瀏風滿城披衣成坐起太息此長征
嗟余兄弟樂飄泊十年餘何日還同被無端悔讀書長
思種禾麥歸去事樵漁俯仰平生事茲言恐遂虛

蕭瑟流哀韻窮愁損壯心頑軀合蓬蘖歸夢滯梅林旅
館殘鐙暗山城夜漏深長安三月聚舊事費追尋
慷慨吾猶記牢騷世易驚願持養氣論保此可憐生予
季身應健高堂淚恐盈昔賢甘旨義聞笛獨淒清

陳廣文

之弼

邀同胡廣文

光琪

曾秀才

毓芳

遊北

塢卽飲承恩祠中還登城南水晶閣壁間讀伯兄
去歲題詩感賦長句

遊山之屐久不著我心鬱鬱空蕭索籠中病鳥困飛翔
淵底潛鱗思奮躍揭來陳丈作東道邀我登臨出北郭

奚童酒榼肩趨蹌振衣張蓋忘拘縛差戢輒塏俯江濱
複道鱗朐見坻崿盤旋屈曲陟其巔頓教眼界消積膜
維山西峙何巘岼一筆插天攢秀削其餘眾峯亦陡絕
如虎投林蛟赴壑中間資水流淺清直下萬里相噴薄
性情浩浩真自得卻念田園轉焦灼小臣憂國無遠圖
但願年豐眾康樂連年水潦費隄防那更冰夷肆威虐
奔馳無補室家謀凋敝更愁民氣弱此時百感填胸臆
悵然迴步心忤若且息世慮談風月杯盤羅列恣吞攫
飢人一飽心已足焉用屠門勞大嚼廣文先生獨豪飲

舉杯一吸無畱杓曾侯不飲逞雄辯賓主襟懷都磊落
勝遊能得幾回來乘興重登水晶閣樓頭埽壁讀題句
寸恨縱橫止還作姜家大被久寂寥天涯鹿鹿同飄泊
臥牀苦語那堪聞臥牀思病母百念委寒灰伯兄詩也東望長空雲漠漠
人生未合許國家便須早辦林泉約麗麗臣臣逐米鹽
拊膺得不滋慚怍夕陽西下成歸還獨眷層霄向寥廓
曾秀才見和遊北塢詩疊韻奉荅

祖鞭寂歷誰先著驅策六馬憑朽索我興東望愁波濤
匣中寶劍時騰躍男兒生世抱奇偉身許功名追李郭

通志豈甘龜曳泥浮念苦同蠶自縛廿年雲海盪心胸
千奇蟠屈森欽嶸無奈蹉跎百慮虛誰憐奄昧雙睛瞶
學詩復乏筆如椽覆瓿空勞簡頻削坐令駒隙去倉皇
祇是鳩藏老巖壑夷途聊復足歸愚世路終然防履薄
安得高天埽嶂翳共看皎月光照灼澄清海宇幸無爲
辛苦流民登極樂方今治術尚寬仁優待臣工無賊虐
要知稱職在求實莫漫偷安委積弱齋齋聖德本淵如
懍懍天威重欽若高岡會聽鳳皇鳴深谷那容豺虎攪
嗟予少賤百無成日向太倉謀飽嚼泰山縱不讓坏土

滄海早知輕一杓君身垂佩紉蘭芬蘭足荒山暫瓠落
自須啟沃升大庭豈合昂藏束高閣濟時賴有百夫特
幽蹈無爲七人作河防正慮國帑糜海市尚多義舸泊
丈夫皎皎恥凡庸對此茫茫甯淡漠新詩贈我未敢當
時事與君重相約詩文小技亦徒勞慷慨狂言原不忤
勉矣前途慎自期大鵬萬里翔空廓

懷人詩五首

湘鄉曾學士

國藩

當代曾南豐植躬何特達鐵中見錚錚天機時潑潑才

雄更氣壯萬事歸提掇俯視衆所能有如寒蟬聒致身
在霄漢追陪青鎖闥欲將華國才報此 聖恩拔我思
古人臣氣局亦疏闊但其所事事豈僅文辭末公今眷
方隆國計待旋幹要知豫則立漫謂穎能脫願公辦經
濟爲時慰飢渴上紓宵旰憂下使閭閻活拭目觀新猷
安用書咄咄雕蟲非壯夫夙愛當暫割

湘鄉羅秀才

澤南

濂溪說太極聖道有綱維遂令宋代賢繼起相追隨羅
山復好事埋首殫精思衍作人極圖欲用牖民爲陸王

嚴所辨正學立其規剖析及牛毛推勘到繭絲以此窮
日夜兀兀竟忘疲繼往以開來匪君焉任之仰視青天
高俯瞰江水馳日月照不息波濤駐何時邈然縱遐想
耿耿當告誰

新甯江孝廉

忠源

鷹鷂不化鳳虎豹不變麟性定難可易物何異於人同
年江老岷獨出冠等倫早歲性佻蕩揮霍動千緡鐙前
舞紅袖陌上隨輕塵袒跣擲六簿落拓京華春頗遭眾
口詆莫或與交親屠刀一朝放佛地倏而臻幡然革故

態藹藹歸良循理窺周孔秘詩與韓蘇鄰復篤友朋誼
患難情愈真但一轉移間迥若再世身愧我獨頑梗未
使舊染新小人將下達欲走徒跣跣君行策驂駟我分
逐羝羶感歎爲此詩有病合當呻

湘鄉劉隱君

蓉

龍城劉夫子閉戶對周孔讀書每千遍博學凌五總當
其究心時鑽堅勝鑿空精至義自通豁如底脫桶積累
有歲年不復畱纖矇若彼登山然飛步造龍嵒世界倏
空明下方但塤塤憶昔始識面君氣頗不董朋儕日爛

漫酬應紛倥偬巨眼少見推多士徒雲滄獨我兩弟兄
一見各心動遂訂性情交歷久逾洞洞今君入聖奧鸞
鶴已高翔嗟予鴻鴈行展轉困竹籠奔馳兀不休虛靈
漸而懵深愧相期意愁懷浩漭漭

長沙馮孝廉

卓懷

修竹無曲竿勁松無拳柯斷斷馮孝廉質直少偏頗持
身一何潔取友期相劇所知苟中變立絕無婬耍丰裁
峻難犯山斗森差峩及其同志士結契周以和時或爲
人謀忠信懷不磨氣盛情更癡迥殊世曰窠因茲半毀

譽亦用增蹉跎仙人騎鳳皇壯士斫蛟鼉兩途一無就
潦倒將如何潦倒將如何轉瞬鬢已皤儒生自有志豈
必登巍科不如歸去來避彼羅者羅低頭拜孔孟返旆
棲巖阿

胡雲璈祀瞻圖

男兒識字孝養薄利名展轉相束縛壯志苦羨卿相尊
剗肝欲獻激清略請纓射策百無成幡然卻入蓮花幕
特達之才困官府有似明珠用彈雀謬思毗贊濟時艱
不辭奔走躡芒屨遂令踪跡遍閩楚僕痛馬瘖無住著

戴山山上頭白鳥啞啞哺雛在林壑雛成欲遂返哺私
振翼翩翩向寥廓吁嗟丈夫志四方翻遜老農力畊鑿
餘閒猶得話團圞村酒煨鑪對斟酌今君驥足絆羈紲
萬里雄姿乖奮躍倚閭悵望念慈親陟屺瞻依怨牢落
畫圖示我索題句使我披圖重慚怍兄弟無故父母存
昔賢重之謂一樂柰何舍此骨肉歡潦倒天涯覓升勺
屺岵高岡同一望離懷耿耿那拋卻君家本住鑑湖邊
有山臥龍峯放鶴我亦湘江敝廬在一家暢敘足歌嘯
何如共賦歸去來養親甘旨兼脾臄但謀聚首卽清福

焉事依人苦飄泊世俗紛紛輕別離斯言不值一大噓
獨抱深衷持告君仰視浮雲埒霄堦

雲臥山莊詩集卷第一終

男慶

藩護

孫本

堽堅

恭校字

雲臥山莊詩集卷第二

湘陰 郭崑燾 樗安

四朝泉歌爲胡潤之作

廣文先生胡潤之與我縱談山水奇爲言其鄉山之岬
有泉浩漭蓊萬巖晴虹日照細雨吹絃涌自浪非人爲
背壑穿石一徑危厯年斯萬未或知阿兄好事夷隄陝
鳩工鑿險成高圯匠氏飲啜是焉資日日汲酌持軍持
飛流倏見噴屣屨其勢厖蹙吼中達澎湃聒谷少逶迤
鬼神驚聲下躩踞須臾奔湍如告疲汎濫不動空漫漫

一落一起餘濕隨渾冥上激出復歧因茲守候勤測窺
子午卯酉無愆期此理難曉言匪欺勸我犯暑爲歌詩
我聞海水來滄湄潮汐至信分疾遲海眼涓涓雪峯陞
但應潮候焉有敘斯泉趵突分四時異聞每令聽者疑
地氣彭魄事可推邗須格物費覃思慚予聞尺聲更雌
蟬翼蚓竅世所訾辱君諉譴安敢辭一語告君君莫嗤
在山之泉清漣漪入世豈免容垢黷盈科而進茲靡虧
漂沙塋岸或非宜方今亢旱憂饑飢炙灼不間井與畸
胡不泓而爲深池溉彼枯槁成蕃滋嗚呼海潮日轟馳

疏寫我欲煩馮蠓魴潯鯢渚渺天涯泉乎滂湃獨何居
詩成擲筆重吁噦持示君兄儻措頤

重遊北塢遇雨示同遊諸君兼寄伯兄江西

天公作秋亦狡獪一雨三日破炎靄火御宵將息行轍
金風日已噓清籟鄒君好事礮落人謁來邀作登臨會
狂奴雙腳頑鐵鑄豈有雅游翻引避呼朋重躡磨牛迹
長街潔淨無纖塹是時濃雲黹交集須臾急雨下霏霏
泥途滑澁困足力疾趨邴復憂顛沛瞬息遂達承恩祠
汗流氣喘心無賴抖擻精神登塢頂周覽欲窮千里外

煙雨空濛翳萬象俯視模糊眼如昧惟聞泔泔溪水聲
瀉入資江相激汰珠跳亂打水紋埽石氣遙連天宇邃
始知雨景固自佳縱有良工費描繪曠觀已覺塵溷捐
豪飲况復清酤斂酒闌興盡西日斜詠歸徐徐巡畎澮
儵焉餘漑灑滂溥有似滌濯還曝曬嗚呼田園久待澤
得此庶幾活禾穗吾徒憂樂貴同民何止一身期暢遂
履汗衣漬細故耳乃心所願安敢懟所嗟歲月去堂堂
過隙之駒不我遲去年鄉里浩遊興謂是此樂方未艾
去年文昌閣看荷花七夕飲彈指光陰一載餘棲皇苦
陳爍宅均與伯兄有唱和詩

被蠅頭累貧家惟有弟兄親如鳥鵲獸狼狽耦畊未
買桑麻田聽雨因多離別淚天涯屹岵共瞻依耿耿羈
愁勞寤寐古來賢聖半風塵顧我何人堪自諉輪蹄消
盡良不辭甘旨缺如斯可愧龜毛徧刮不成羶郎且覓
食惟甘帶寄人廡下等傭奴不如歸去噉粗糲諸君意
氣凌霄漢瑣語故應遭唾棄爲詩持報老東坡湘上秋
風足魚膾

重過白馬市見刈稻已了偶作述懷

磨牛陳迹幾經過瞥眼韶華歎逝波世路棲皇同夏熱

客中情緒覺秋多不堪時事憂饑饉已分浮生老薜蘿
且喜田園無恙在築場稍稍見登禾

游南村呈鄧湘皋年丈

顯鶴

卽壽其七十

資水出都梁東流與湘會礪爲百里灘一瀉逞澎湃南
村蔚其中山谷鬱幽怪巍然杜陵叟大隱成境界至性
秉肫篤浩歌發雄邁前賢許抗席餘子等自鄙我昔見
公詩一讀輒一快傾倒思執鞭無緣通謦欬囊筆走高
平老成及酬對豈期虎魄杯吸取到纖芥冬晴日色暄
峯巒吐煙靄招邀宿草堂竟夕畱清話側坐聆緒餘浩

浩豁我隘更持登山杖健步撥荒蕨言尋葉公山巨石
交撐挂摩崖數大字蒼古見心畫循畦陟龍巖萬木森
晻藹中有連理枝比埵相鉤帶由來覩人瑞盤桓動珍
愛德門慶方長芝蘭爭蔚薈各各富文藻楚國藉張大
我家近騷壇正則愧緯繡雕蟲空自憐埵驥良有賴湘
南文獻徵此事方未艾祝公更期頤爲時開晦昧水流
緜以長山靜屹不壞眉壽諒如斯願歌無有害

出都

請纓射策都無分又促輪蹄返故邨萬里西風吹木葉

一鞭斜日渡蘆溝登朝自有夔龍在避世甘從麋鹿遊
滿眼蒼生正饑饉卻因歸路抱深憂

平原道中聞歌

一曲嬌音百轉哀鴟弦嘈切暮雲開蒼生兒女無端感
竝入琵琶調裏來

襄城旅店次壁間韻

山城寂歷漏聲殘皎月當空玉露團愧我征途拋歲月
驚心窮巷迫饑寒流亡何處謀生計撫字從來賴長官
憂世憂民空萬感天涯惆悵整歸鞍

萬里長城幾霸才投閒置散事堪哀誠知公論千秋定
終願天心一日回海國烽煙方振旅中朝籌畫重儲財
草茅深計曾何用且酌村醪笑口開

三生石上證前盟擾擾長途念友生太息征鴻當夜發
淩兢瘦馬踏泥行湖湘悵望應多感京洛羈棲祇爲名
一夜相思三地共無端根觸別離情

燕南趙北屢閒關客況塵勞值等閒策士有人辭白水
歸休無計買青山經營大棟材誰任犖确空林石自頑
立馬高岡重回首玉堂瞻望在雲閒

萬樓觴月歌卽送陳懿叔

學受

廣尊

溥

昆仲之黔

中

昭潭水月清可盤
濫濫皎澈青霞端
飄蕭自有兩黃鵠
又此秋中天未寒
有鳥有鳥翅翎短
亦欲嚶鳴舒其翰
涼雲散盡夜寥泐
萬里一白餘青團
舉杯邀之入我座
扶疏雙桂花初攢
旁有落落之疏星
下有潏潏之微瀾
襟情豁朗有如此
琅然使我摧心肝
黔山蒼蒼沅水寒
飛飛雙鵠不可攀
春秋易象共千載
懿叔治春秋廣尊治易俱以千載自
命各與斯世聯痼瘵
飢疲滿眼漲未已
而我游宴方清

歡人生離合亦偶爾明年待子湘之干

對月有懷成五絕句

朔風吹雨作嚴寒竟日羈愁不可刪何意開簾見明月

天涯先照鬢毛斑

忽憶龍城劉白水

霞仙隱君

支離病骨近如何南豐

曾滌生學士

騰躡江東老

羅羅山秀才

爲爾蒼茫斫地歌

馮唐

樹堂孝廉

辛苦落炎荒江總

岷樵明府

騫騰入帝鄉故侶獨

餘徐穉在

石泉孝廉

佛林西望暮雲蒼

慷慨縱橫陳廣專翩然獨與哲昆俱

謂懿叔

亂流激石灘

聲惡念爾蠻江一棹孤

負米生涯亦自憐壯心蕭瑟夢歸田凍雲殘雪無消息

稽秀才句孤負梅花又一年

秋感五首

蕤蕤窗前樹鮮鮮籬下菊離披對秋風倏忽變蕭蕭駸
駸隙中駒望望去不復爲冬能幾日羲御轉北陸霜氣
亦已凝萬象悄在目嗟哉壯士懷日與飛雲逐

湘陰之東北洞庭浩漫漫資湘沅澧流匯此爲大觀予
家一畝居乃在城市間凭高望遠水亦足清塵顏奈何

舍之去栖栖曠關山謀生計多拙入世術未嫻坐令七
尺軀顛倒役飢寒迢迢白雲端高堂屬平安伯也衡嶽
游三旬遲來還支撐累予季何以承親歡家庭但熙和
菽水逾盤餐奔走固吾職長鋏行罷彈推窗見寒月一
鏡光團團

寂處日多思所思在吾黨落落二三子襟袍各軒朗或
戢影自精或乘風縱響或渺若難追或浩若無濠隨其
所近造而各有氣象翩翩凌霄鶴脩然任孤往嚶嚶幽
谷鶯求聲引清吭飛鴻鍛其翮展轉墮塵網喑口不敢

鳴失羣徒慨慷矯首望雲間高天何蕩蕩

出門有所適及戶忽已返乃心良俛俛豈曰足疲蹇行
行識夷途獨往未覺遠羊腸互其前一瞥入峻阪驚懷
慮顛蹶伫立求安穩雖云大道迷或免微軀損不然信
步往謂當凌絕巘失勢及摧頽悔之吁已晚從來夷險
境歧路每交混望崖空復歸此生長息偃予行正無涯
何由慰繾綣

今年江水漲懷襄遍三吳倒漾及楚甸大勢趨重湖老
蛟更肆虐所過成邱墟坐見廬井間莽莽生菰蒲手足

竭衣食身家逋賦租哀哉窮巷民流亡滿路隅飢寒之
所迫豈免爲萑苻我聞救荒政法與捍患俱 聖朝寬
大恩甯忍人爲魚奉行在大府要當規遠圖上紓宵旰
憂下念民力痛實政果能及羣生亦已蘇感歎激秋風
吾言信拘迂

爲李明府題畫四首

退思圖

男兒七尺軀蝨彼宇宙內渺如稊米耳乃與兩大配惟
仁爲之根胞與宏厥愛祥和所充溢見面而盜背輔之

以智勇有動期必逮積誠爲感通推暨斯無礙先生今
夏吏所至起殘廢豈伊刑政施飲食與教誨竭來寫真
容示我仰風裁藹然古鬢眉恍共賢人對自言平生志
落落本恬退宦途尙威猛極目同一嘅居官有何能安
靜道斯在亮哉仁人言使我藏肝肺君今得上考敷布
壓僚輩行當高其翔與時撥荒蕨賤子愚一得輒貢三
尺喙惺惺心自明斷斷責誰貸願兼達德三庶取韋弦
佩

海鶴圖

仙鶴勵羽翼皎皎無凡毛脩然下天半巨石臨江高仰
觀瞰日光俯瞰千尺濤昂昂出世界卓立空雲霄凡鳥
何嚶嚶飛鳴引其曹新聲競鶯燕中谷喧鴟鴞黍粟頗
能啄鸞鳳久寂寥鶴兮獨無心斂翅待扶搖八風冷然
來搏之淩九皋一舉再舉間天地同昭昭焉知鶉鷃羅
自入青冥遙吾聞鶴之生氣與陰陽交金火所因乘千
歲常不凋遐哉崑崙宴眾神相嬉遨翩翩始翔集和鳴
鏘九韶時無師曠琴亦乏蕭史簫氈氈不解舞乃用騰
譏嘲何當舒員吭爲洗羣鳥囂

春山策杖圖

山人足清興落落誰能窮結廬深樹林一徑連蒙茸幽
居謝塵事策杖登前峯懸崖矗石壁孤亭翼其中層巒
互環抱秀削攢芙蓉寥寥縱遐矚浩浩凌青空年來山
水游歷歷藏心胸展圖若有悟萬象森昭融蜀山吾未
到傳聞頗蠶叢君家桂湖上華萼對蔥蔥何當結比鄰
誅茅遠相從他年儻攜手酩酊醉郵筒

秋江風雨圖

邵翁畫手天下奇足跡所歷筆達之淋漓潑墨軼六法

一一乃與造化期斯圖放筆作雨勢似有雲氣豪端馳
秋高萬象轉蕭索紛紛紅葉下江湄森然古木失蔥蒨
卓立夜戰寒風淒老翁挈舟犯急雨晚涼得不愁無衣
昭潭之水清漣漪上有昭山高嶽寄先生爲政尚休養
德澤頗似時雨施編氓已復安作息坐見百里無飢疲
春溫秋肅各有道江頭野老爾何悲題詩卷畫三歎息
寸心遠度湘之陞

喜胡廣文

光琪

見過卽送其之長沙兼懷新化諸

君子

三年不見悵離羣蕭瑟江東黯暮雲豈謂昭潭重到日
忽從官閣一逢君青氈浪說楊夫子白首相看鄭廣文
舊事蒼茫怯回首卻因尊酒憶河汾

謂王廣文家俊

陳迹勞勞歎磨牛故交僂指莽離愁天涯各有依人感
幕府誰憐橐筆游西去辰山連桂嶺東流漢水下黃州
哀時懷舊情何限明日思君湘上舟

時鄧孝廉琮隨侍南村老人客邵陽

曾秀才毓芳客桂林鄒孝廉驥迪客襄陽鄧明經瑤客黃州

黎秀才讀書圖

俗儒誤帖嗶兀兀守陳編丐殘拾唾餘輒用相矜然大

意嘗不覺況乃云精研黎生卓犖士屬念窮幽元脩然
擁書城抗志在前賢吾聞古之學體用交爲緣不窺載
籍博如射張空卷不探理道好一得終莢莢蕩蕩百斛
胸昭曠浮天淵擴之日以充肆應通經權所爲暢其流
豈不貴其源予生頗志學點勘費丹鉛墮身塵網中有
動常拘攣溫故覩新知庶以期無愆抱膝坐名山多君
正芳年廣大與精微勉矣求真詮

書曹秀才珂遺集後

十年前識曹文叔慷慨襟期故儼然生世嘔心存一卷

當時豪氣已重泉
邛山零落空餘憾
生死蒼茫莫問天
何限淒涼鄰笛感
寒鐙風雨對遺編

葉明府

維藩

梅花冊子次伯兄韻

梅花之癖稱逋仙
古來高躅誰能攀
西湖浩漾二千里
落日澹澹低寒山
憶昨聯翩城東隅
老梅如雪纔一株
膽瓶清供意未饜
倅來爛漫見斯圖
縱橫大筆爭雄奇
飄蕭風雪交迷離
美人娟娟綻瓊蘂
幽士落落森虬枝
孤山未到空遙注
君行放棹重湖路
花時且飲三百杯
更看春江生遠樹

苦雨歎

殷雷鬱陰氣急雨鳴喧聲旅人念鄉國百慮聊一陳去
年夏秋交苦雨近十旬重雲翳皎日積潦薄城闔瀕湖
十萬家辛苦事耕耘竭彼終歲力所入差自存一朝付
洪流田廬委沈淪幼者依父母老者將兒孫丁男棄妻
孥少婦離夫君流離遍道路逃亡去鄉枌清水調糠粃
芼以雜菜羹數日得一飽已覺腹可捫尋常安樂年生
男如掌珍鄰家有好女相約爲婚姻雖非紅絲繫好合
亦孔云時艱人命賤鬻之豪貴門所得復幾何一歲值

一緡嗟哉婢與僕誰非兒女倫飢寒迫性命復聚已無
因生離與共斃兩者同悲辛入冬稍晴霽相率歸其村
無衣得日燠再拜天公仁盡此卒歲苦屬望方在春菜
菽及蕎麥亦足資饔飧展轉備禾種謂待秧可分東風
扇春和青鍼滿郊原運極或能返庶以蘇我民誰知二
三月一雨動浹辰狂飈扇空來浩浩吹濃雲豈不覩日
色朝晴午更昏坐見稻芽壞無由覩其蕃直恐窮巷間
骨肉填畦畛側聞 朝廷詔屢沛蠲賑 恩博施古所
難屢荒膏且屯誰分宵旰憂克致陰陽均衙齋夜無寐

聽雨愁我神推枕起長歎安能叩天關

岸花亭小集次陳刺史韻

杜老停舟此一灣千年寂寞掩禪關攜朋快踏城東路
跋履同看湘上山古意縱橫雲水外詩懷詆蕩酒杯間
登樓王粲方蕭索傑閣憑虛費仰攀

隔屋書聲隱約聽暫看鸞鵲戢修翎竹陰映字連窗綠
山色迎人渡水青一代英才培養重百年喬木錯盤經
次公自是狂言慣莫向尊前笑獨醒

策馬長吟激楚風坐聞征鴈唳寒空茫茫古道秋無色

滾滾江流日向東豪飲百壺傾
易盡新詩一曲和難工
勝游莫忘酣歌處從此兒童識醉翁

叔和弟寄示疊餞春韻八首
弟素未從事吟詠喜
其遂能成章又念予與伯兄終歲奔馳不獲自相
師友感成一律

未辦林泉臥枕流乖離予季愧斯游
聯牀苦憶同心友
破睡空吟不夜侯
白日看雲虛大被
青鐙聽雨數更籌
茫茫廿四橋頭水長逐離情過遠洲

遣興疊前韻

齷齪來航斷港流神仙聞挾兩龍游狂言臧竟能三耳
傳食鯖羞列五侯寂寞獨餘塵外賞輸贏一任局中籌
披雲臥雪尋常事何物真人住島洲

傳聞湘水復橫流惆悵田園在下游直恐膏腴成澤國
可憐生計付陽侯驚雷號號喧天鼓苦雨淒淒亂夜籌
客感鄉心兩無奈夢魂逕欲度中洲

古詩

我年十一戰文場當時意氣何激昂抽刀便擬斷流水
舉手逕欲摩穹蒼邇來蹉跎已三十尚逐鹽米羈窮鄉

長安少年多豪俠，車輪碾破紅塵香。黃金門闌白玉堂，美人侑酒垂明璫。吹竽挾瑟逞歡樂，清風流韻蒼霞揚。腐儒咋舌安敢望，且對寒鐙盡一觴。

昔我北發臨洞庭，一氣遠欲浮滄溟。煙波浩渺望無際，惟見隱隱君山青。岳陽樓上發長嘯，真人下降仙梅亭。殷然授我鍊藥訣，約我空山劬茯苓。我時再拜謝，且陳古來丹訣多。杳冥男兒墮地有職事，一事未了羞鍊形。眞人大笑跨鶴去，仰視不見清風冷。平生塵鞅自此始，黃梁之夢安能醒。

昨夜狂風捲屋瓦今朝急雨奔騰下
長空濃雲黯不開旅人對此淚如瀉
祝融司方萬物茂陽氣乘權陰蓋寡
聖人在上陰陽和今茲風雨胡爲者
天時人事兩茫茫嗟哉三管方戎馬

皇天平分成四時暑寒涼燠各有宜
北方苦寒南方燠地氣所限非天道
奈何五月尚披棉嚴風如秋扇蒼昊
窗前新植八芙蓉園丁護惜如珍寶
爲言此物喜潤澤得雨則生日則槁
天公惜花豈有意屢日不放驕陽杲
我聞此語重欷歔詳觀物理心如擣
嗟爾園丁知不知

前村農民方種稻

西山有鳥號鳳皇毛羽五色聲鏘鏘飢食竹實棲梧桐
翩然獨向千仞翔當時應瑞鳴岐山詩人發詠稱歸昌
謂是靈禽久戴德一鳴當令羣響默竭來騫舉在高岡
眼看黃鳥啄黍稷眾目睜睜盼一擊鳳兮恬然若罔識
嗚呼鴟鵂正飛騰爾鳳反不如蒼鷹

黃昏薰風吹園林蒼然古木交陰森南山喬松高百尺
飽歷霜雪蟠遙岑良工熟視不敢伐有鶴棲息名胎禽
每當夜半發清唳山中百鳥寂如暗下有幽士方讀易

停聲靜聽生雄心便思仗劍挾飛電去上緱嶺揚仙音
比鄰爆竹驚鷓鴣世間鳴聲何聒聒

大鵬怒飛快遊遨俯視藩籬訾其曹搏風直上九萬里
失勢一落仍蓬蒿長鯨聳翅如山高獨行江海翻洪濤
偶然乘潮向洲渚水淺不得同魚逃惜哉二物豈不大
命運所值羞螭螭人間何處能自恃嗚呼吾意終鬱陶
我欲乘舟泛滄海蓬萊之山高崔嵬上有仙人美容顏
被服纖羅絢光采皎皎初日照屋梁可憐媚好常不改
弱水汪洋三萬里聳身欲往慚庸猥悵然返棹趨沅湘

自向秋風擷蘭茝

舟中雜感疊前流字韻

輓轡日夜轉中流半載滬江三度游久客漸能消壯志
辭家無計覓封侯妻孥回首鄉關夢風雨驚心驛路籌
何限秋懷來永夕萍根飄泊又荒洲

秋深熠燿失宵流萬感蒼茫負壯游痛哭賈生空有策
出師李廣未能侯勞勞塵世水浮芥蕩蕩寒空星轉籌
倚劍沈吟獨愁絕恰聽漁笛起前洲

寄懷劉秀才

蓉二十四韻

不見劉夫子，肫然結此心。乖違孤德業，蹤跡感浮沈。
憶作長沙客，同爲躡壁吟。我愚初學語，君見獨知音。
抗首頻懷古，論交遂到今。蹉跎豪氣斂，鑽仰道根深。
諸子方殽亂，遺編費酌斟。研精窮至理，揮手撥重陰。
皎日三霄徹，寒山萬木森。六經煙海義，千載聖賢箴。
奧窔升堂入，淵源鑿空尋。會看鸞鶴舉，盡廢蠃蛙淫。
比歲嗟分袂，無緣筮盍簪。鴻泥成碌碌，駒隙忽駸駸。
自分塵埃老，難堪梁棟任。望洋迷學海，易涸等蹄涔。
舊雨思何極，秋風颯已臨。別來時事改，索處外憂侵。
烏鵲羞爭食，鷦鷯欲覓

林願陪幼安席對鼓伯牙琴身世安能料馳驅恐不禁
區區存幻想耿耿在微忱照影仍明月開門盼曉參淒
涼歌一曲離憾滿江潯

贈園丁

園丁姓范氏

人生貴適意隨境得所於鬱鬱自結束甯非計之疏園
丁爾何人近市闢幽居小園無半畝花木固有餘殷勤
事灌溉身勞心則舒目不識一丁而知重詩書護惜及
零斷檢點或溝渠以是足此生豈必羨簪裾古有號花
隱斯人其徒與逍遙鳥翔林局促驥伏車瓏屑較窮達

不值一笑啖塵土能浣身爾職在埽除蔓草亦防花爾
力爲誅鋤文字如菽粟點畫皆菑畚爾能慎收拾屬念
異徒胥豈惟異徒胥士夫多不如爲詩謝園丁感之起
長歎

次韻荅歐陽秀才

勳

塗鴉慚愧說逢時興到揮毫意頗隨未必夫人容婢學
清風林下或吾師

未進齊梁窺筆法浪隨流俗說羲之半生辛苦真何益
待向天涯訪斷碑

強從豪髮門精勻虛譽空傳巧冠倫臨徧晉唐諸小楷
竭來目已不如人

不斂縱橫就樸瀉隸分終失昔賢真憑君爲問江東老

謂羅研生明經九勢年來可入神

出門二首

晨光悽已動惘惘行出門出門亦何爲辛苦飽與溫濃
雲悶天黑勢挾風濤奔挂帆向中流性命隨吐吞時艱
身不貴名賤道非尊吾其老風塵夷險安足論

歲晚霜雪寒游子各旋歸嗟予方首塗有淚不能揮仰

天見征鴻肅肅相隨飛顧念我兄弟終歲常相違行年
已三十鬢髮寢欲稀何時買青山邛岨得所依男兒會
有志後來儻可幾

舟中阻雨寂坐無憀用伯兄重陽日拈一年年覺
惜重陽韻作詩七首

皇天不雨二百日高田低田龜坼出沛然一雨慰三農
而我扁舟方赴汨重灘在眼不能上推篷獨自聽蕭瑟
嗚呼江神豈我怪三度所遇胡如一

今歲三過瀉
江皆遇雨

舟師數輩雜逌眠鼾聲如雷當我前呼之不謦起還笑

沽酒盡醉歌扣舷晚來新炊汲江水得飽捫腹忘其天
嗚呼吾生役萬慮營營豈不羞長年

伯氏昭潭羈一羶季也未返長沙船出門殷殷語妻子
檢點門戶資爾賢此時含悲百感集但一回首增淒然
嗚呼人生各有適我得所適終何年

羣蠻雕面橫刀稍大軍如山嚴鼓角男兒身手萬夫雄
誓埽欃槍興禮樂入門皇皇出門歎臥聽鄰雞聲喔喔
嗚呼霜落江天寒長宵大夢誰驚覺

河流浩浩波翻白平疇忽變蛟龍宅帑藏百萬築隄防

空使司農勞計畫天子未紓宵旰憂羣臣好建平成策
嗚呼南服多瘡痍國計民生兩宜惜

江空夜靜濤洶洶嚴風吹雪成隆冬孤舟無鎧萬象暗
惟見天際浮雲衝旅人欲睡忽驚起隱隱山寺鳴晨鐘
嗚呼殷憂遂達旦歸夢不度山千重

少時慷慨志四方常恐鬱鬱老窮鄉五年飢走敝精力
卻望故國魂飛揚曰歸曰歸歲云暮往共良會歌淋浪
嗚呼我行正未已此願乃似葵傾陽

瀉上行

浮雲東南飛倦鳥西北翔廿六我始行犯險達靖江易
舟遂言邁三日雨浪浪冬十一月朔長至生一陽肩輿
入官府曉色方微茫朋輩聞我來殷勤道溫涼生徒聞
我來肅衣登學堂主人聞我來欣喜復傍徨惟時徵
國賦嘖嘖人言唵謂當變舊例觀望遲輸將鄉愚昧大
體百和歸一倡時時聞聚鬩勢眾不可降客子本畏人
對此懷憂傷寸心雜鐘杵往復相擊撞緬維雍乾間薄
海富倉箱催科民不擾撫字吏能良邇來十餘年水旱
連江湘蒼梧更變亂盜賊久披猖聯翩過將卒拮据供

餽糧民困官亦疲如身集千瘡此邦號沃壤乃是一郡
望積銖以爲斤用茲護甘棠豈曰取非盈於民亦無妨
羣生順帝則畊鑿職所當胡爲習刁健奮臂成螳螂大
木垂繁陰潛蛟穴其旁羣螫日爬土蛟出木易僵木僵
誠可惜螫身又焉藏蚩蚩闇遠慮耿耿摧人腸出門晤
友生惶恐驚吠羗入門對羣徒啾唧啼寒螿主人重多
難昨者遭兄喪抱憤歎拊膺含悲泣沾裳使我去住難
退遂同羝羊逕思賦歸休三徑容徜徉苦無東坡田戀
此陸氏莊回頭望鄉國浩浩雲山蒼請聽瀟上行長歌

增慨慷

江霧

江霧隱江樹江風捲江波風急霧更深霧散風乃和隄
邊有大樹密葉交繁柯向榮正欣欣垂影初峩峩畏彼
波濤撼柰此風霧何臨觀忽悵觸淚下時滂沱願言寄
此心此心隔關河關河豈云隔但恐心有佗空濛望遠
天感歎因成歌

題畫山水

披圖惆悵苦低垂十載山居計已遲時事傳聞堪破膽

壯懷牢落入愁眉關河道遠無消息風雨家園有夢思
安得誅茆林壑裏閉門便與世相遺

題畫

斜風西南來音響何蒼涼動搖及草木倏忽隨低昂不
見挺挺松矗立南山岡羣芳委零落那復相扶將騷人
慕蘭蕙攀佩歌采薌發興各有託覽物意已長臨風懷
美人良會在高堂欲往道阻修念之斷人腸堂上樹蔭
草堂下生海棠多謝傾城姿邂逅請偕臧

壬子八月以避亂挈眷入山道經高華嶺回憶十

年前過此曾題詩亭中今字已磨滅詩亦幾欲忘
之惟起二語尙約略可記感歲月之易邁念時事
之方艱因取前聯足成八韻

高嶺摩天起登臨浩遠哀舊游成一夢十載此重來搖
落荒亭晚盤陀石徑開山光仍落日礮響忽驚雷鼓角
長沙急風霜短鬢催瞻烏方慨歎我馬已虺隤蹇步憐
兒女憂時愧草萊烽煙渺南望嗟爾捍邊才

聞稽秀才將之無錫寄送二律

山居日日愁烽火更望河西憶故人聞道移家向吳會

幾時鼓棹發湘濱廿年來往初無間一別倉皇獨愴神
世事交期兩難料知君歧路亦沾巾

五月上旬相見日兩人意氣尙嵯峨及君聞道方歸里
正我攜家欲渡河萍梗東西從此散楚天蕭瑟不堪歌
吾生已分田間老爲問行藏計若何

似聞

似聞當道礪干戈欲捍妖氛奏凱歌坐使千夫成壁壘
強憑一簣障江河杞人漫作憂天計策士行看接踵過
終是澄觀懷遠慮四郊儲蓄已無多

往事回頭膽尙驚見愁伏莽有逃兵諸君何計驅烏合
老我關心聽鼓聲致用要須謀實濟整軍莫但取虛名
腐儒妄議吾何敢洗眼高原起旆旌

聞長沙解嚴賊分道西竄感賦一首同伯兄作
危城忽報甲兵休百戰奇功一夕收技盡黔驢終自散
命延封豕使人愁塵沙擾攘西風急鼓角喧闐楚澤秋
寄語元戎須努力伏波莫更賈胡畱

簡稽秀才

聞君駕扁舟江干遇寇兵舍舟棄行李母子踰踰行平

疇浩空闊辛苦相支撐連騎倏西來叱咤悲風生覲面
不敢殺橫刀作虛驚豈伊羣盜仁哀憫此嬛嬛鬼神下
呵護彼醜安能爭臨資富庶鄉商賈所經營我舸與小
艇何止千百盈一一掠之去去向百里程孰無懷歸心
畏彼鋒莫撓咄哉僕婦賢義重身命輕深入虎狼窟旦
夕喻以誠誠至物自動感孚及蛟鯨翩然掉船返履險
直如平行資十存五安穩達湘城君妻及君女先夕詣
女兄畱宿未放歸若天感其情我時臥空山戢影學忘
情聆茲忽慨歎驚喜淚還傾欲往苦不暇孤懷自相縈

窮居萬峯窩有田足躬畊雖非桃花源聊堪樂逃名東
歸旣無田結鄰有舊盟遭逢勿復言庶以求友聲痛定
豈忘痛我歌君當賡

絕句

弓刀肅隊錦衣鮮馬上爭看美少年一宿經過如電掣
至今墟落欲無煙

游民多少在戎行草莽還愁伏虎狼何限杜陵憂世意
悲吟同谷夜淒涼

感事九首

城南烽火徹秋雯戰哭悲涼不可聞忍使羈魂啼夜月
愁看畫棟矗飛雲三軍已化蟲沙盡萬竈猶餘蟻垤紛
鼯睡公然來臥榻諸君何計埽妖氛

湘水源頭擁萬艘舳舻太守獨賢勞臨江一旅支全楚
苦戰三辰激怒濤烈火忽飛兵氣作大旗不動鼓聲高
功成未拜封侯賞壁上諸君正建旄

百戰將軍意氣橫指揮慷慨賦西征欲憑孤嶼成天險
卻陷全師藉寇兵擊檄人誰投袂起登陴士已望風驚
大功未就威頻挫嗟爾當時勇敢名

公子翩翩起奮戈縱橫奇氣未消磨曾聞習戰教吳女
便欲臨戎作楚歌搏兔不成獅力盡驅羊無奈虎威何
人前莫漫誇身手試望青燐夜幾多

無端蟻穴潰金隄粉堞連雲向夕低千炬火光天閃閃
萬家野哭夜淒淒先登無霸驚軀幹當道盤龍振鼓鼙
三度危城幸安堵卽今兵力故猶齊

一枰殘局費支持太息登城誓士時潘美功名纔小就
張堪籌畫未全施殺人豈必非行惠制勝由來在出奇
終日紛紛議攻守權分勢格欲何爲

皇皇使者督師來大纛高牙勢壯哉按轡三旬虛北顧
連雲一角向西開依然蛇豕衝鋒去無復鯨鯢築觀回
倚劍沈吟望天末匡時空憶出羣才

岳陽勢控洞庭秋大將南來此運籌鄂渚上游資鎖鑰
巖城三月宿貔貅艱難小醜方垂斃浩蕩長驅竟自由
寇騎已過羣盜起經旬未報返車騶

世事真堪發浩歎前車回首感無端 詔書屢下和衷
誠 國計甯爲袖手觀欲策治安應痛哭側聞 宵旰
正思艱草茅敢信談兵易但願軍中有一韓

擾攘

擾攘嗟何極殲擒事總虛居然制兵禮竟欲廢詩書莫遣民情惑仍愁武略疏同心望諸將殺賊勿躊躇

山居雜詠

卜居得佳境忘機愜所便羣山如擁抱山遠地愈偏望不見村依依上炊煙有時山霧起氣逐飛雲連密如細雨絲因風滿窗前兒曹忽驚告不辨地與天一笑且勿訝居高固宜然

築室十餘楹闢地裁八丈中庭奠室家門戶頗軒爽倉

廩建其東歲取祝豐穰西宅處僮僕亦復列書幌牛羊
與雞豚一一勤豢養寬然常有餘知足得心廣庶幾隨
老農鼓腹歌擊壤

山翁氣渾樸衣冠猶太古歲時相過從瓊屑談稼圃晉
接一何恭欲言先偃僂兒童八九歲力作忘其苦客至
解趨承環觀聚儕伍怡然各天趣曾不羅世畧雅羨無
懷民淳風此焉覩

山高水亦長流泉日潺潺飲之味清冽足以沁心肝亦
用漑田園終歲無旱乾待澤今方殷釋耒慨多歎平疇

半龜坼田功無由完餘潤灑不及我心殊未安嗟彼山
中人嬉嬉正歡顏

鑿山作原田山農多苦辛每於率律間參差見畦畛空
際下牛羊雲中事畊耘頗疑彼其子無乃仙之人生計
豈云拙時事日以新遲迴攬世故孰愈深山長鑱白
木柄吾亦謀吾身

武昌旅寓次韻寄伯兄江西

吾生潦倒竟何求襤被擔囊復此游城市荒蕪聞野哭
關山迴合入深憂愁看鄂渚煙波闊夢想章江戰伐秋

兩地相望各戎馬不堪聽雨獨登樓

鶴樓滕閣舊輝煌畫棟飛甍今戰場六月愁霖勞跋涉
深宵殘角助悲涼共將迂拙參戎幕敢怨飄零在異鄉
時事可爲身有用天涯灑淚望吾皇

雲臥山莊詩集卷第二終

男慶

藩護

孫本

圭堅

恭校字